

الفا جومى

وكلما جاءوا للفرجة علينا
تفرجت أنا عليهم!

- قالوا عنا خارج مصر؛ إنهم زمجرة الغضب الآتى.
- محمود حسن إسماعيل قال لي: أنت شاعر..
- فوقفت أمامه «زي الجحش».
- الظاهره الشيطانيه اللي برزت فجأه من تحت بيت
- متها لك في حارة حوش آدم.

oboiikan.com

قبل ما نخش في المجمعه الإعلاميه عايز أقول إن الصديقين فهمى حسين ومحمد حجبى وبباده شخصيه سبقوا العاصفه وزارونا في حوش آدم عشان يكتبوا عننا مقاله في مجله صباح الخير تحت عنوان "الحاره المصريه تغنى لجيفارا".

يومها استمتعت برسومات حجبى الجميله... رسم المكان بما فيه ومن فيه. كان موجود فؤاد قاعود ومحمد على ومحمود اللبان والشيخ إمام وأنا... حسب رغبة حجبى فضلت أنا للأخر.. ولما قعدت قدامه عشان يرسمنى ماركزتش زى عوايدى... فقال لى:

- يا أبنى أهدم شويه خلينى أعرف أرسمك دنا بأرسمك بتحيز.

وكتب الأستاذ فهمى حسين عن المكان العجيب اللى طلع من أحشائه الصوت اللى غنى في رثاء جيفارا العظيم ولما استعرض سكان المكان قال عن شخصي الضعيف- ومنهم الشاعر أحمد فؤاد نجم غزير الإنتاج الجيد قليل الحظ مع هذا في فرص الذبوع والانتشار - أنا بس حبيت أسجل الوقعه دى عشان كل واحد ياخذ حقه.

نرجع لموال المجمعه الإعلاميه والشهره اللى هبطت علينا في أعقاب الزياره الميمونه اللى كرمنا بيها الأستاذ رجاء النقاش وصحته.

أصوات مختلطه صدرت عن كل قنوات الإعلام المرئي والمسموع والمقروء والرادار والأشعه فوق البنفسجيه.

كله بيتكلم عن الظاهره الشيطانيه اللى برزت فجأه من تحت أنقاض بيت متهالك في حاره حوش آدم يحمل رقم ٢.

ناس كانت مع.. ناس كانت ضد ومحسويك آخر استهبال راسم العبط وعمال

أتفرج على دول ودول.

كل رموز الثقافه والفن والإعلام تقريباً.. يا إما جم يتفرجوا علينا في حوش آدم يا إما سحبونا على أرضهم في السهرات الخاصه وكله كان بيتفرج وهو مدهوش وعشان كده ما حدش فيهم خد باله مني وأنا باتفرج عليهم!

لكن على أي حال الأمر ما سلمش من مكاسب شخصيه عظيمه للعبد الفقير مثلاً..

بعد حفله نقابه الصحفيين الأولى قال لي الأستاذ رجاء النقاش:

- دا محمود حسن إسماعيل معجب بيبك جداً وعازب يشوفك.

أنا ما صدقتش وداني.. قلت له:

- محمود حسن إسماعيل مين؟

قال لي:

- الشاعر.

وبدأت أكلم نفسي:

- محمود حسن إسماعيل معجب بي أنا؟ يا خرابي يا أمه.. شاعر النهر الخالد العظيم اللي كنت مجرد ما أسمع اسمه بدني يتلبس وأحس كأنني واقف قدام مقصوره سيدنا الحسين طالب الصفح والرضا!

أنا صحيح عمري ما شفته ولا في الصورة لأنه ما كانش من نجوم الإعلام لكن أنا رسمت له صورته في خيالي.. فارس ملثم وممتطي صهوة حصان عربي من نسل الأدهم حصان عترة العبسي فارس الفرسان وقاهر الشجعان وكانت الصورة دي بتبقى قدام عنيا كل ما أسمع عبد الوهاب يغنى له:

نحن شعب عربي واحد

ضمه في حومة البعث طريق

الهدى والحق من أعلامه

وإباء الروح

والعهد الوثيق

أذن الفجر على أيامنا

وسرى فوق روايبها الشروق



قلت لرجاء:

- إنت بتشوفه يا أستاذ رجاء؟

ضحك وقال لى:

- أيوه وهو عايز يشوفك.

قلت له:

- إمتى؟

قال لى:

- زى ما تحب.

قلت له:

- أحب حالاً.. دلوقتى.

قال لى:

- خلاص بكره نروح له المكتب

تانى يوم كنا عنده فى المكتب وما حدش يسألنى المكتب كان فىن؟

لأنى وأنا ماشى مع الأستاذ رجاء ما كنتش شايف السكه.. أنا كنت عمال أرسم فى عقل بالى صوره اللقاء.. وفجأه لقيتني وجهاً لوجه مع شاعر النهر الخالد.

ما أقدرش أقول إن صورة الواقع كانت مطابقه لصوره الخيال.. فى الخيال كان ملثم فما شفتش ملامحه وكان راكب حصان فما قستش طوله وعرضه لكن هنا فى المكتب كان إنسان عادى شعره الكثيف المجدد الأبيض كان نايم على ورا ووشه النحاسى المصوص كأنه تمثال فرعونى اندفن فى طمى النيل وطلع اتحمص تحت شمس أسوان الملتيه.. أول ما بصيت فى وشه افكرت:

على صهد الأرض السمرا

وأنا أبوى النيل سوانى

ممصوص وخنن من بره

زى الطينه الأسوانى

والخنصره فى جلىبى وجلىبى

دايمًا على طرف لسانى

فقت من سرحانى لقيتنى فى حضنه وهو بيردد جملة لسه مش فاهمها لغايه
دلوقتى.. كان بيقول:

- هذا شاعر يا أستاذ رجاء.. ناشدتك الله هذا شاعر.. كررها أكثر من مره وأنا
واقف زى الجحش مش فاهم حاجه.. لكن صورته اللقاء ده فضلت محفوره على
صفحة قلبى.. وجرى ما جرى ودخلت المعتقل وخرجت منه ودخلت تانى وخرجت
ثالث ودخلت رابع وهكذا إلى أن جاني خبر موت الشاعر الفارس محمود حسن
إسماعيل فى الغربه.. مات فى الكويت ياولداه! ما تعرفش كان هناك فى شيخوخته
بيعمل إيه؟ بيحسن دخله ولا هربان من الجحود والتجاهل والقهر اللى شافه هنا..
هنا فى مصر وعلى شط النهر اللى غناه و غنى له..

الغريب فى أمر محمود حسن إسماعيل إنه عاش فى وطنه غربه العصافير وهاجر
منه هجرة العصافير وفى المهجر مات موته العصافير.

انقطع التيار الكهربائى فجأه واتعطل جهاز التكيف.. وفرفر عصفور النيل
الأخضر ومات.. مات عطشان فى الصحرا!!

ما تقولش هو دمل وانفقع! يا سبحان الله.. كان فيه دا كله؟ هي مجرد إشاره
وصدرت عن أبصر مين.. ودول قالوا:
- خد عندك.

مطر مقالات ودراسات وريبوتاچات صحفيه نزل يرخ يرخ على قرعة بنت أخت
القراء العرب: بخصوص الثنائي اللي ظهر فجأه فى حوش آدم ناس قالوا علينا
ظاهره. وناس قالوا لا دا الرد الشعبي على الهزيمة العسكريه وناس سمونا
"الإرهاصه" وناس سمونا "المخاض" دا الكلام دا هنا فى مصر.. خد عندك بقى فى
الوطن العربى السعيد فى تونس والمغرب كان اسمنا- الشجب التحتى!- وفى سوريا
ولبنان كان اسمنا. صوت نغمه الجماهير- أما فى الشقيق العراق ودا اللي كان
عاجب الشيخ إمام جداً" فكان اسمنا زمجرة الغضب الآتى.

لأومين بقى اللي كتب؟ مثلاً.. الدكتور فؤاد زكريا رئيس تحرير مجله الفكر
المعاصر- آنذاك- والأستاذ محمود أمين العالم رئيس مجلس إداره دار أخبار اليوم-
آنذاك برضه- والدكتور حسن حنفى والدكتور لويس عوض والأستاذ كامل زهيرى
نقيب الصحفيين والأستاذ عبد الرحمن الخميسى والأستاذ محمود السعدنى والأستاذ
جلال السيد والأستاذ محمد تبارك وكله تقريباً كان.. آنذاك!

.. الوحيد اللي ما كنش- آنذاك- هو الفلاح الفصيح عمدة مصطبة الكلام وعم
المتكلمين وبر الأمان لأى فلاح فصيح شايف وخايف وعمايز يفضفض بالكلام يقوم
يروح يرمى حموله على كتاف شيال الحمول وقطب الرجال، عبد الفتاح الجمل،
فلاح النيل الفصيح.

.. الرجل ده ما انجرش ف الزفه الأولانيه.. فضل ساكت لحد ما المراكب انحقرت
وكشروا لنا عن أنيابهم ولفقوا لنا قضيه المخدرات. راح كاتب عمود فى جريده
المساء اللي كان هو رئيس تحريرها يبشده على إيدنا ويقول لنا أنا معاكم ومعايا كل
ولاد مصر الطيبين وييقول فى نهايه العمود- ياعمنا الشيخ إمام ويا فتى الفتيان نجم
أشد على أيديكما وأحى فيكما العناد.

تصدق بيايه إن العمود ده ونسنى - آنذاك - وكأنه كتبه صواريخ بتحميننا.. نرجع بقى للزفه الأولانيه.

آنذاك كانت مجله الكواكب فى مقدمه الموكب وحصلت على سبق صحفى عباره عن حفل ساهر حتنظمه فى نقابه الصحفيين للشئائى اللى ملا الدنيا وشغل الناس مع الاعتذار الشديد لعمتا المتنى... وفعلا اتحدد موعد الحفله وكانت الدعوه عامه كمان قررت مجله الكواكب إقامه معرض لتمثيل الفنان التلقائى محمود اللبان بمبنى دار الهلال.

وحكايه تلقائيه محمود اللبان بدأت بعد محمد جاد ما رجله خدت ع الحته ويوميًا عامل السكه قياسه، ورايح جاي الحظ زى ترمای المديح وذات مره شاف محمود اللبان بيعمل لنا متقد لزوم القعه... كان يجيب صفيحة السمته التلاته كيلو ويقصها نصين ياخذ النص ويجيب كوز سلمون مفتوح من التاحيتين ويركبه فوق ويشبته بالجبس يقوم بيقى مدخنه ويكسيها جبس م الجنبين فتبقى شبيهه بالضريح أبو مادنه وفتح لها هوايه من تحت تجيد الهوا على فوق يخلى الفحم آخر صهلله! قوم إنت يا عم محمد يا جاد انسطل وافضل برق فى المنقد حبتين وروح صارخ فى وش محمود اللبان لبش جتته أكثر ما هى متلبشه:

- إيه ده؟ دافن تشكىلى!.. يخرّب بيت أبوك يا محمود يا ابن الكلب.. وقبل محمود ما يستوعب الصدمه كان محمد جاد ضارب إيدته فى جيب السويتر الجلد البنى ومطلع جنيه - يدبج الفرخه - أيام ما كان الجنيه جنيه - وقال له:

- الصبح تعمل لى واحد زى ده..

